

Nama : _____

Tarikh : _____

BAHAGIAN A
SISTEM BAHASA DAN APLIKASI BAHASA

[35 markah]

SOALAN 1 : MORFOLOGI

Baca petikan di bawah dengan teliti dan senaraikan **empat kata terbitan**. Kemudian anda dikehendaki membina **satu ayat anda sendiri** daripada setiap **kata terbitan** tersebut untuk menunjukkan bahawa anda faham akan maksud dan penggunaannya. Anda tidak boleh menggunakan perkataan itu sebagai peribahasa atau nama khas.

Sistem pendidikan negara amat menitikberatkan kemahiran membaca, menulis dan mengira (3M). Kemahiran 3M ini sangat penting untuk menentukan tahap pembelajaran murid hingga peringkat seterusnya. Sebelum berlaku penularan COVID-19, sudah terdapat kebimbangan dalam kalangan pentadbir sekolah mengenai murid yang gagal menguasai 3M. Umumnya, guru mengharapkan agar mereka sudah menguasai kemahiran asas itu sebelum melangkah ke tahun satu.

Dipetik dan diubah suai daripada, 'Atasi isu penguasaan 3M elak murid keciciran',
Oleh Fatimatul Nafisa Shaiffuddin, Berita Harian, 2022.

(8 markah)

SOALAN 2 : SINTAKSIS

Berdasarkan petikan di bawah, kenal pasti dan tulis **subjek** dan **predikat** yang lengkap bagi tiga ayat yang anda pilih seperti yang berikut.

Kesungguhan kerajaan negeri memberikan pengiktirafan kepada penulis anak negeri sememangnya dialu-alukan. Usaha kerajaan negeri bukan sahaja membantu dalam memperkembangkan sastera di peringkat negeri malah hingga ke peringkat kebangsaan. Usaha ini juga ternyata menyokong amanah diberikan kepada Dewan Bahasa dan Pustaka (DBP) untuk memperkembang bakat sastera. Kerajaan Perak dan Kedah turut membuka penyertaan kepada pengarang anak negeri untuk mencalonkan karya masing-masing.

Dipetik dan diubah suai daripada 'Utamakan mutu karya' oleh, Muadib Mohamad, Mac 14, 2022.

(6 markah)

SOALAN 3 : PENYUNTINGAN

Bahan-bahan di bawah mengandungi **pelbagai kesalahan bahasa**. Senaraikan dan betulkan kesalahan yang dikenal pasti dan membuat pembetulannya. Anda tidak perlu menyalin petikan-petikan tersebut.

Petikan 1

Sambutan Hari Malaysia yang lalu menterjemahkan konsep Keluarga Malaysia. Dalam mengharungi frasa ujian pandemik ini, kebajikan komuniti petugas barisan hadapan tidak dilupakan. Berbagai program amal telah dijalankan sebagai usaha membantu apa yang

boleh meringankan bebanan petugas barisan hadapan. Keluarga Malaysia menjadi aspirasi untuk seluruh rakyat tanpa kira agama dan bangsa supaya saling bantu-membantu demi meringan beban.

Dipetik dan diubah suai daripada rencana 'Penerapan nilai Keluarga Malaysia suntik semangat kebersamaan dalam komuniti' Utusan Malaysia, 2021

(6 markah)

Petikan 2

Pandemik Covid-19 mengejutkan warga dunia dan memberi kesan pada organisasi. Sebagai individu dalam sesebuah organisasi, sudah pastinya kita perlu tahu akan peranan masing-masing. Semua ada tanggungjawab tersendiri dan saling melengkapi antara satu sama lain. Semua kaki tangan memainkan peranan tersendiri tanpa mengira kuasa. Setiap individu yang berada dalam organisasi perlu sehati sejiwa di dalam melaksanakan segala tugas demi untuk kemajuan organisasi.

Dipetik dan diubah suai daripada rencana
Nilai Positif Perkukuhkan Keharmonian Di Tempat Kerja, <https://theinspirasi.my/>

(5 markah)

SOALAN 4 : BAHASA MELAYU STANDARD

Baca petikan Bahasa Melayu Klasik di bawah ini dengan teliti. Kemudian tulis semula petikan tersebut dalam **Bahasa Melayu Standard** tanpa mengubah bentuk dan maksud asalnya.

"Hai Temenggung, suruh segala saudagar berkawal pada kampungnya!". Maka Temenggung pun menyuruhkan orangnya berkisah orang kaya-kaya dan saudagar. Kertala Sari pun membaca pustakanya lalu berjalan di tengah orang banyak itu. Setelah hari pun siang, orang kaya-kaya itu pun datang menghadap raja dan mengadukan halnya kecurian semalam itu. Baginda pun hairan serta bertitah pada Temenggung.

Dipetik daripada Kepimpinan Melalui Teladan antologi Jaket Kulit Kijang dari Istanbul,
Kementerian Pendidikan Malaysia

(6 markah)

SOALAN 5 : PERIBAHASA

Baca petikan di bawah dengan teliti dan kemukakan **tiga peribahasa** yang sesuai berdasarkan cerita yang diberikan.

Ramli merupakan anak kesayangan Mak Jah. Beliau sangat mengambil berat tentang pelajaran dan menjaga Ramli dengan penuh kasih sayang. Mak Jah sanggup bekerja keras demi menyara keluarga. Ramli sedar akan pengorbanan ibunya dan belajar bersungguh-sungguh. Malah, Ramli belajar bersama-sama rakan-rakan sekampungnya demi mencapai keputusan yang cemerlang. Usaha gigih Ramli dan rakan-rakannya itu akhirnya membuahkan hasil. Ibu Ramli sangat gembira melihat kejayaan anak kesayangannya.

(6 markah)